



U ovom broju:

- ➔ **OBILJEŽEN
4. APRIL - DAN OSLOBOĐENJA
OPĆINE TEŠANJ OD FAŠIZMA**
- ➔ **JAČANJE ULOGE
MJESNIH ZAJEDNICA**
- ➔ **ADRESNI REGISTAR**
- ➔ **AKCIJA ČIŠĆENJA NA
PODRUČJU OPĆINE TEŠANJ**
- ➔ **STIPENDIRANJE STUDENATA**
- ➔ **TEŠANJSKO PROLJEĆE**
- ➔ **SAJAM SREDNJIH ŠKOLA I
FAKULTETA**



OPĆINA TEŠANJ

Trg Alije Izetbegovića 11

www.opcina-tesanj.ba

e-mail: optesanj@bih.net.ba



OBAVIJEST POLJOPRIVREDNIM PROIZVOĐAČIMA

Obavještavamo poljoprivredne proizvođače, da je usvojen Program novčanih podsticaja za unapređenje primarne poljoprivredne proizvodnje na području općine Tešanj u 2016. godini. Zahtjevi sa propisanom dokumentacijom mogu se podnijeti u prijemnoj kancelariji općine Tešanj, ureda u Jelahu u Tešanjci počev od 25.04.2016. godine.

Ujedno obavještavamo poljoprivrednike da je Federalno ministarstvo za poljoprivredu, šumarstvo i vodoprivredu objavilo Program poticaja za poljoprivredu u 2016. godini, a također i Vlada Kantona usvojila Program podsticaja u poljoprivrednoj proizvodnji u 2016. godini.

Za sve potrebne informacije možete se obratiti u Službu za finansije, privredu, komunalne i inspekcijske poslove općine Tešanj kod Tamare Turkić ili na tel. 032 653-915.

TRAJNO STAMBENO ZBRINJAVANJE

Ministarstvo za boračka pitanja ZDK, 28. marta objavilo je Oglas za dodjelu novčane pomoći braniocima i članovima njihovih porodica u svrhu trajnog stambenog zbrinjavanja.

Prijave na Oglas se mogu izvršiti do 27.04.2016. godine putem Službe za boračko-invalidsku zaštitu i opće poslove Općine Tešanj, a ujedno to je i posljednji dan prijema zahtjeva.

Oglas je istaknut na oglasnoj ploči Općine Tešanj, a dostavljen je i boračkim udruženjima na prostoru općine Tešanj.



Izdaje: **OPĆINA TEŠANJ**

Redakcija:

Edina Kadušić, Samir Brka,
Kanita Gredelj i Bahrudin Nočić.

Glavni i odgovorni urednik:

Edina Kadušić

Adresa Redakcije:

Općina Tešanj, Trg Alije Izetbegovića 11
74260 Tešanj

Telefon: 032/650-022 (lokal 107)

Fax: 032/650-220

E-mail: press@opcina-tesanj.ba

Tiraž: 2.000

Štampa: Grafik-komerc

STROGO ZABRANJENO NEPROPISNOM PALJENJE VATRE NA OTVORENOM PROSTORU

Prema dosadašnjem iskustvu Službe civilne zaštite, Profesionalne vatrogasne jedinice Tešanj, u prethodnim godinama na području općine Tešanj, usljed obavljanja radova čišćenja, poljoprivrednih, šumskih i drugih površina, odnosno prilikom loženja vatre i spaljivanja korova, suhe trave, lišća, i otpada, dolazilo je do velikog broja požara niskog rastinja, a koje su izazivali pojedinci svojim nemarom ili pak svjesno, usljed čega je dolazilo do neželjenih pojava nekontrolisanog širenja požara na susjedna područja i objekte, čime su ugrožavani ljudi, prirodni resursi i materijalna dobra.

S obzirom da je sezona proljetnih radova već započela, zbog vremenskih uslova, podsjećamo građane da je **STROGO ZABRANJENO** paljenje vatre na otvorenom prostoru, na mjestima koja se nalaze u neposrednoj blizini objekata, šuma, benzinskih i plinskih stanica, kao i na nepristupačnim mjestima na kojima nije moguć pristup vatrogasnih vozila.

Prilikom loženja vatre i spaljivanja korova, građani se moraju u potpunosti pridržavati i poštivati propisane mjere opreza kao što su:

1. Prilikom čišćenja parcela, prikupljeni otpad spaljivati uz maksimalne mjere opreza i lično prisustvo dok otpad ne izgori.
2. Ne ostavljati upaljenu vatru ili žar nekontrolisano na njivi.
3. Prije polaska sa njive ili kampovanja, politi vatru ili žar vodom, ili zatrpati zemljom.
4. Posebno voditi računa da se paljenje otpada ne vrši u blizini šuma, stambenih i privrednih objekata, benzinskih pumpi, plinara, a naročito u toku pojave vjetra.
5. Paljenje otpada vršiti u ranim jutarnjim, a ne večernjim satima.

Ukoliko, i pored svih preduzetih mjera dođe do požara koji više nije moguće kontrolisati potrebno je obavijestiti:

1. Dežurnog u Profesionalnoj vatrogasnoj jedinici Tešanj na broj telefona 123 i 032/650-720; ili
2. Dežurnog u Policijskoj stanici Tešanj na broj telefona 122 i 032/650-014; ili
3. Operativni centar civilne zaštite na broj telefona 121 i 032/650-439.

Podsjećamo da su odredbama člana 169. Zakona o zaštiti od požara i vatrogastvu („Sl. novine FBiH“ broj: 64/09) predviđene novčane kazne za pojedince u iznosu od 100,00 do 1.500,00 KM, koji svojim postupcima omogućuju nastanak požara, kao što je na nepropisan način loženje vatre na otvorenom, u šumama, na šumskom zemljištu, ili na drugom zemlji. U skladu sa navedenim zakonskim odredbama, kod pojave ovakvih situacija bićemo prisiljeni da u saradnji sa Policijskom stanicom Tešanj, identifikujemo lica i preduzmemo odgovarajuće zakonske mjere u cilju suzbijanja nastanka i širenja požara.

POMOĆNIK OPĆINSKOG NAČELNIKA
Mensur Saletović, profesor

U sali Općinskog vijeća Tešanj, u četvrtak, 31. marta sa početkom u 14,00 sati održana je 39. sjednica Općinskog vijeća sa predloženim dnevnim redom:

1. Nacrt Odluke o izmjenama i dopunama Regulacionog plana "Poslovna zona Glinište" Općina Tešanj,
2. Prijedlog Odluke o usvajanju Programa novčanih podsticaja za unapređenje poljoprivredne proizvodnje na području općine Tešanj u 2016. godini,
3. Prijedlog Odluke o izmjenama i dopunama Odluke o kriterijima, načinu i postupku raspodjele sredstava udruženjima i fondacijama,
4. Prijedlog Odluke o kupovini i prodaji zemljišta neposrednom pogodbom u Jelahu,
5. Prijedlog Odluke o prodaji nekretnina radi oblikovanja parcela u Rosuljama,
6. Prijedlog Odluke o raspisivanju Javnog konkursa za parcele broj: 5/4 i 5/26 u Poslovnoj zoni Bukva,
7. Prijedlog Odluke o raspisivanju Javnog konkursa za parcelu broj: 5/30 u Poslovnoj zoni Bukva,
8. Prijedlog Odluke o raspisivanju Javnog konkursa za parcele broj: 325/55 i 325/56 na Krndiji,
9. Prijedlog Odluke o gubitku statusa Javnog dobra – put,
10. Prijedlog Rješenja o imenovanju Komisije za monitoring nad realizacijom Strategije razvoja Općine Tešanj,
11. Prijedlog Rješenja o razrješenju i imenovanju člana Komisije za budžet i člana Statutarne komisije Općinskog vijeća Tešanj,
12. Informacija o ostvarivanju prava pripadnika boračkih populacija putem Službe za boračko-invalidsku zaštitu,
13. Informacija o radu Zavoda za zapošljavanje - Biro Tešanj za 2015. godinu,
14. Informacija o radu i funkcionisanju organa mjesnih zajednica u 2015. godinu.

Na samom početku sjednice, na prijedlog Općinskog načelnika, 9. tačka Prijedlog Odluke o gubitku statusa Javnog dobra – put povučena je sa dnevnog reda i ostavljena za narednu sjednicu Vijeća.

Tokom današnje sjednice, najviše rasprave je bilo oko Informacije o radu i funkcionisanju organa mjesnih zajednica u 2015. godinu, koja je nakon dodatnih pojašnjenja usvojena.

I ostale tačke dnevnog reda Vijeće je usvojilo i završilo sa radom u 18,35 sati.



OBILJEŽEN 4. APRIL - DAN OTPORA FAŠIZMU

Povodom općinskog praznika 4. aprila - Dana otpora općine Tešanj fašizmu, Općinski načelnik upriličio je prijem za predstavnike javnog i kulturnog života općine Tešanj. Prijemu je prisustvovala i delegacija Oružanih snaga BiH. Prigodnim govorom gostima su se obratili Općinski načelnik Suad Huskić i predstavnik Vlade ZDK – Ministar za poljoprivredu, šumarstvo i vodoprivredu Himzo Smajić, te u svom obraćanju istakli važnost 4. aprila za sve građane općine Tešanj.

Otpor fašizmu je otpor ideji podjele, sukoba ili zločina. Taj otpor je potreban u svakom vremenu i svakom društvu, te smo mi kao sredina, kao općina Tešanj i kao građani općine Tešanj opredjeljeni za jedinstvenu BiH, rekao je Općinski načelnik Suad Huskić.

Nakon prijema, položeno je cvijeće na Centralno spomen obilježje šehidima i poginulim borcima u Tešnju. Cvijeće su, u ime Općine položili predsjedavajući Općinskog vijeća i Općinski načelnik, delegacija Oružanih snaga BiH, predstavnici boračkih organizacija i Odred izviđača Crni vrh. Tokom dana, cvijeće je položeno i na spomen obilježja u Jelahu i Tešanjci.

U 17,00 sati, u Centru za kulturu i obrazovanje održana je i promocija knjige *U ime istine – Tešanj 1992-1995. godina.*

Inače, prema odluci Općinskog vijeća 4. april - Dan otpora fašizmu se obilježava kao sjećanje na početke otpora agresiji na BiH 1992-1995. i sve značajnije događaje u ovom periodu, ali i iz ranije historije vezane za otpor ovog kraja fašizmu.



OBILJEŽENA GODIŠNJICA FORMIRANJA 207 POUSORSKE LJUTE BRIGADE

Povodom obilježavanja godišnjice formiranja 207 pousorske ljute brigade, predsjedavajući Općinskog vijeća Tešanj Senad Subašić i Općinski načelnik Suad Huskić upriličili su prijem dijela komande i pripadnika ove brigade. Prilikom ovog susreta razgovarano je o sjećanjima na odbranu tešanjskog kraja tokom agresije na BiH 1992-1995. godina. Također, razgovarano je i o obilježavanju značajnih datuma i čuvanju od zaborava kroz razne publikacije kako bi mlađe generacije imale prave informacije o ovom periodu.



JAČANJE ULOGE MJESNIH ZAJEDNICA U BOSNI I HERCEGOVINI

Općinski načelnik Suad Huskić prisustvovao je ceremoniji potpisivanja pisma namjere i prvom radnom sastanku nakon provedenog javnog poziva Jačanje uloge mjesnih zajednica u Bosni i Hercegovini. Općina Tešanj i 13 mjesnih zajednica uputili su zajedničku aplikaciju na objavljeni javni poziv koji je zajednička inicijativa Vlade Švicarske i Vlade Švedske, a koju provodi Razvojni Program UNDP BiH. Nakon provedene procedure i terenskih provjera uslijedio je izbor općina, kada je i Općina Tešanj zajedno sa 12 drugih Općina izabrana za nastavak saradnje na projektu čija vrijednost iznosi miliona CHF. Vrijednost projekta za Općinu Tešanj je 220 000 KM.



U narednom periodu predstavnici UNDP BiH će izabrati 6 mjesnih zajednica od 13 koje su aplicirale i sa kojima će se nastaviti saradnja i realizacija konkretnih organizacionih i infrastrukturnih projekata na području općine Tešanj.

Cilj projekta je poboljšanje uslova za život i rad na području općine Tešanj, aktivnije uključivanje u rad mjesnih zajednica socijalno isključenih kategorija i žena, kao i aktivniju ulogu mjesnih zajednica u donošenju odluka.

ADRESNI REGISTAR: U TOKU POSTAVLJANJE PLOČICA SA BROJEM

Svečanim postavljanjem prve pločice sa brojem 1 na zgradu Općine Tešanj, počela je implementacija projekta Adresni registar, koji će se u naredna dva mjeseca provoditi na prostoru općine Tešanj.

Nakon provedenog postupka javne nabavke potpisan je ugovor sa izvođačem radova, firmom Eurovez. Vrijednost projekta, kojim je obuhvaćeno postavljanje oko 14 000 kućnih brojeva i naziva ulica, je 69 000 KM, a sredstva su obezbjedili Švedska fondacija CILAP i Općina Tešanj.



Naredni koraci su postavljanje adresnih brojeva na sve objekte u Tešnju, Jelahu i Tešanjci. Vrlo nam je važna saradnja građana općine Tešanj, te ovom prilikom želim naglasiti da u cijelom postupku nema nikavih troškova za građane, kazao je Općinski načelnik Suad Huskić.

Radove na postavljanju tabli i pločica i označavanje objekata adresnim brojevima na licu mjesta obavljat će izvođač radova, firma Eurovez, uz prisustvo predstavnika Općine Tešanj.

Građani se mole za strpljenje i pozivaju da pruže maksimalnu saradnju, budući da će u toku ove aktivnosti predstavnici Općine Tešanj prikupljati podatke radi unosa u bazu podataka adresnog registra.

ZAVRŠENA AKCIJA ČIŠĆENJA NA PODRUČJU OPĆINE TEŠANJ

U cilju podizanja ekološke svijesti i podrške uređenju našeg životnog okruženja, Općina Tešanj je i ove godine, od 20. do 27. marta provela akciju na čišćenju izletišta, putnih pojasa i vodotoka. Pojedinačne aktivnosti koje su više godina česte na našem području ovom akcijom se objedinjuju. Pozvani su i građani da počiste prostor ispred svojih kuća i stanova, a škole da uredе svoja dvorišta i poligone.

U okviru akcije, firme na zimskom održavanju puteva očistile su kolovoz, trotoare i rigole od zaostalog posipnog materijala, a ujedno pokupile i otpatke iz putnih kanala.

Općina je sa grupom nezaposlenih lica sa Biroa rada organizovala čišćenje šiblja i granja na obalama i smeća iz korita rijeke Tešanjke, a vatrogasaci su očistili okretište za autobuse srednjih škola u Dolcu.

Ove godine posebno su masovne akcije Udruženja ribolovaca iz Kaloševića i Jelaha, Ekologa iz Jablanice, Izviđača na izletištu Kiseljak i polaznika Mektebske nastave. Zajedno u akciji bili su i lovci, šumari i mjesne zajednice Kalošević, Jablanica, Trepče, Bobare, Rosulje i Mrkotić.

Učinci su veliki:

**72 organizovane grupe na 70 lokacija/dionica i cca 2180 učesnika,
250 km očišćenih puteva, kolovoza, trotoara, rigola, obala, ribarskih staza,
2500 prikupljenih vreća otpada,
155 zasađenih sadnica.**

Svim organizovanim grupama, Općina je pružila podršku dodjelom vreća za otpatke, zaštitnih rukavica, sendvičima i osvježenjem, a Komunalno preduzeće RAD je svojim vozilima preuzelo smeće na deponiju.

SADNJA DRVEĆA PRIJATELJSTVA

Povodom početka novog ciklusa IT trening programa pod nazivom BILD IT-Razvoj IT stručnjaka u regiji Doboj-Tešanj-Gračanica, upriličena je ceremonija sadnje drveća prijateljstva na dvije lokacije u Tešnju (Musala i Krndija). Ceremonija se organizirala u saradnji sa Općinom Tešanj, organizacijom BILD, te polaznicima obuke iz Tešnja i Doboja.



Kroz ovaj projekat, mladi ljudi imaju priliku za posao kao softwer programeri koji je uistinu vrlo težak. Na primjer, mi smo imali oko 200 aplikacija, pa se svelo na 19 ljudi iz Tešnja, a sad ih je samo 5 na našem avansnom kursu. Ljudi ne moraju platiti ništa, ali su obavezni na dolazak 4 puta sedmično i moraju pomoći zajednici, kroz odgovoran rad i dobru volju, kazao je Christopher Bragdon direktor organizacije BILD.

Trenutno smo u projektu koji teži tome da se mladi usavršavaju u IT tehnologijama, kako bi kroz to usavršavanje obezbjedili sebi radno mjesto. Danas su iz društvene odgovornosti došli ovdje i zasadit će na dva mjesta određeni broj stabala koji će podsjećati na uspjeh i realizaciju ovog projekta, kazao je Općinski načelnik Suad Huskić.

Nevladina organizacija BILD - Bosanska inicijativa za lokalni razvoj u saradnji sa softverskim kompanijama iz BiH, Općinom Tešanj i drugim

općinama u regionu implementira projekat pod nazivom BILD IT-Razvoj IT stručnjaka u regiji Doboj-Tešanj-Gračanica. Projekat ima za cilj omogućiti mladim ljudima iz Tešnja i regiona da uz pomoć usvojenih znanja i vještina iz oblasti programskih jezika koji se koriste u razvoju IT-a, pronađu zaposlenje u sektoru informacionih tehnologija u BiH. Projekat predviđa jednogodišnju obuku mladih osoba starosti od 20 do 35 godina kako bi postali izvrsni stručnjaci za programske jezike koji se koriste za softversku komponentu razvoja informacionih tehnologija (Java i Eclipse IDE sa uvodom u Java Patterns, JUnit, Tomcat, Maven, servlete te HTML i CSS). Obuka je besplatna za sve osobe sa područja općine Tešanj, a za više informacija o samom projektu i načinu prijave za pohađanje obuke molimo vas da posjetite web stranicu projekta www.mozemo.ba.



I NASTAVAK IZGRADNJE III TRAKE U BUKVI



Realizacija projekata finansiranih u sklopu Grant sheme Unapređenje poduzetničkih zona u Federaciji Bosni i Hercegovini za 2015. godinu, na području općine Tešanj započela je realizacijom ugovora potpisanog između Općine Tešanj i firme Dobojputevi d.d. Doboju Jug - nastavak izgradnje treće trake saobraćajnice kroz Industrijsku zonu Bukva.

Projektat je vrijedan 200.000,00 KM i zajednički se finansira sredstvima Federalnog ministarstva razvoja, poduzetništva i obrta, Švicarske Vlade, UNDP-a i Općine Tešanj.

Projektom proširenja saobraćajnice kroz Industrijsku zonu Bukva, izgradnjom treće trake, Općina Tešanj stvara bolje uslove u odvijanju saobraćaja, te stvara pretpostavke za stavljanje u funkciju i investiranje na parcelama koje su u obuhvatu Industrijske zone.

I ODRŽAVANJE REGIONALNOG PUTA R474



Ministar za prostorno uređenje, promet i komunikacije i zaštitu okoline ZDK Fahrudin Brkić, Ministar za poljoprivredu, šumarstvo i vodoprivredu ZDK Himzo Smajić u društvu direktora Kantonalne direkcije za ceste Refika Zekovića posjetili su općinu Tešanj i susreli se sa Općinskom načelnikom Suadom Huskićem.

Tokom sastanka, razgovarano je o rekonstrukciji i održavanju regionalnog puta R474 Novi-Šeher-Prnjavor, sa posebnim fokusom na problem izlivanja površinskih voda na kolovoz, sanaciji udarnih rupa, postavljanje zaštite od odrona (stijene u Tešnju), te sanaciji odbojne i pješačke ograde na mostu Lejle Mulalić u Jelahu.

Ovom prilikom, Načelnik je informisan da je za tekuće održavanje izdvojeno 200 000 KM, te da je potpisan ugovor za projektovanje mosta u Jelahu, a ubrzo će početi i sanacija ograde.

I PRIJEM RAGBI REPREZENTATIVACA BIH



Povodom osvojenog drugog mjesta na *Evropskom prvenstvu* u Andori, Općinski načelnik Suad Huskić primio je selektora Safeta Čerima i dio ragbi reprezentativaca BiH. Radi se o tešnjacima Ameru Sinanoviću, Mehi Tanjiću, Selminu Beši, Nuriji Navrbocu, Eldinu Kotoriću i Miralemu Lekiću, članovima *Tešanjskog ragbi kluba* koji nastupaju za reprezentaciju BiH.

Općinski načelnik je čestitao reprezentativcima i selektoru na postignutom rezultatu, te kazao kako je ponosan da su za ovaj uspjeh zaslužni i sportaši iz Tešnja, te im zaželio uspjeh i u narednom periodu.

I SASTANAK SA PREDSTAVNICIMA BICIKLISTIČKOG SAVEZA BOSNE I HERCEGOVINE



Općinski načelnik Suad Huskić primio je predstavnike Biciklističkog saveza Bosne i Hercegovine - Vladimira Kvalja i Igora Sekulića. Ovom prilikom, razgovarano je o biciklističkoj utrci koja će se 24. aprila voziti na dionici Teslić – Jelah – Doboju – Derventa – Banja Luka. Start utrke će biti u Jelahu u 12,30 sati i prenositi će se uživo na nekoliko domaćih i stranih televizijskih kuća.

Biciklistički Savez Bosne i Hercegovine organizuje dvije najveće sportske manifestacije u Bosni i Hercegovini - Grand Prix Sarajevo od 2014 godine i utrku Beograd - Banja Luka od 2007 godine. Ove dvije manifestacije su od velikog međunarodnog značaja i obje su kvalifikacione za Olimpijske igre u Rijuu.

CENTAR ZA DJECU I ODRASLE SA POTEŠKOĆAMA U RAZVOJU TEŠANJ PREŠAO U NADLEŽNOST ZDK

Općinski načelnik Suad Huskić i direktor JU Centar za djecu i odrasle osobe sa posebnim potrebama ZDK Suno Kovačević potpisali su ugovor kojim Centar za djecu i odrasle sa poteškoćama u razvoju Tešanj prelazi u nadležnost ove kantonalne ustanove. Potpisivanju ugovora prisustvovao je i Ministar za rad, socijalnu politiku i izbjeglice ZDK, Nurđehan Šahinović.

Ministarstvo za rad, socijalnu politiku i izbjeglice ZDK pružit će finasijsku podršku Centru za djecu i odrasle da poteškoćama u razvoju. Dogovori idu u smjeru da Ministarstvo finansira dvije trećine troškova, a da ostatak dolazi iz budžeta općina koje gravitiraju ovom centru. Prvenstveno se misli na općine Tešanj, Usora i Doboj jug, kazao je Ministar Nurđehan Šahinović.

Mi kao općina ostajemo opredjeljeni da sufinansiramo dio aktivnosti ovog dnevnog boravka. U to će se uključiti ZDK, te nadam se i općine Usora i Doboj jug, kazao je Općinski načelnik Suad Huskić.

Centar za djecu i odrasle sa poteškoćama u razvoju Tešanj je osnovan kao pilot projekat i finansirao se sredstvima općinskog budžeta i dobrovoljnim donacijama. Prošle godine, tešanjski biznismen Hajrudin Ahmetlić finansirao je izgradnju zgrade Centra za djecu i odrasle sa poteškoćama u razvoju.



70 GODINA POSTOJANJA OPĆE BIBLIOTEKE U TEŠNJU

Svečanom akademijom i izložbom djela Muse Ćazima Ćatića, Opća biblioteka Tešanj obilježila je 70 godina postojanja. Književni fond Biblioteke broji 70 hiljada knjiga i oko 30 hiljada periodičnih publikacija, među kojima se nalaze i djela Muse Ćazima Ćatića, Hamida i Maka Dizdara, Bore Stankovića, Antuna Gustava Matoša, Hamze Hume, Adem-age Mešića, Mustafe Ćemana i mnogi drugi.

Monografija o biblioteci u Tešnju napisana je nakon 70 godina postojanje ove ustanove. Kroz monografiju su predstavljene sve one ličnosti koje su doprinijele razvoju bibliotekarske djelatnosti, rekao je Esmir Bašić, direktor JU Opća biblioteka Tešanj.

Opća biblioteka je jedina u BiH koja je u posljednjih 40 godina riješila pitanje vlastitog prostora, zajedničkim investiranjem Općine Tešanj i TIKa-e.

U grbu općine Tešanj nalazi se knjiga kao logo i želja da se odnos spram znanja, spram biblioteke, čitanja, spram ukupnog odnosa prema obrazovanju i napredovanju ljudi gleda na takav proaktivan način, rekao je Općinski načelnik Suad Huskić.



POTPISANI UGOVORI SA UDRUŽENJIMA GRAĐANA

Potpisani su ugovori za finansiranje projekata udruženja građana za 2016. godinu. Ugovore su potpisali Općinski načelnik Suad Huskić i 48 udruženja građana sa područja općine Tešanj.

Prigodnim govorom, prisutnima se obratio Općinski načelnik Suad Huskić i zahvalio udruženjima na kvalitetnim projektima, te istakao dosadašnju korektnu saradnju sa svim udruženjima. *Osim ovih projekata, Općina Tešanj finansira i udruženja od posebnog interesa. Vrlo nam je važan projektni pristup i spremnost naših udruženja da na ovaj način apliciraju, istakao je Općinski načelnik.*

Na javni poziv, ove godine ukupno je pristigao 71 projekat udruženja građana. Nakon provedene procedure, prihvaćena su 63 projekta. U budžetu je za ovu namjenu ukupno izdvojeno 267 000 KM.



I TEŠANJSKO PROLJEĆE

Polaganjem cvijeća na mezar *Muse Ćazima Ćatića* u Tešnju počela je i ovogodišnja manifestacija *Tešanjско proljeće*. Cvijeće su položili predsjednik Kulturnog udruženja *Musa Ćazim Ćatić Odžak* i učenici Gimnazije Tešanj.



Polaganju cvijeća su prisustvovali predsjedavajući Općinskog vijeća, vijećnici, Općinski načelnik sa saradnicima, direktorica, profesori i učenici Gimnazije *Musa Ćazim Ćatić* i građani Tešnja.

Nakon polaganja cvijeća, u Velikoj sali Centra za kulturu i obrazovanje održana je priredba *Riznica naše mladosti*, koju su pripremili učenici Gimnazije.

Manifestacija je zvanično otvorena Izložbom *Mali formati* Udruženja likovnih umjetnika BiHu Maloj sali Centra za kulturu i obrazovanje u 17,00 sati.

Tešanjско proljeće nam dovodi ljude sa različitih prostora, donosi nam mnoge aktivnosti, te stoga pozivam sve sugrađane da proprate ovu manifestaciju i na taj način uveličaju pripremljene aktivnosti, istakao je Općinski načelnik *Suad Huskić* i proglasio manifestaciju *Tešanjско proljeće* otvorenom.

Tešanjско proljeće traje do 6. maja 2016. godine.

U TEŠNJU SVEČANO OZVANIČEN POČETAK RADA ONE-STOP SHOP UREDA



U Tešnju je svečano ozvaničen početak rada *One-stop shop* ureda, koji podrazumijeva servis pružanja svih usluga vezanih za pokretanje poslovnih aktivnosti na jednom mjestu, prvi ove vrste u Bosni i Hercegovini, i to u općinama Tešanj, Žepče i Teslić. Radi se o COBEAR projektu koji zajednički implemantiraju općine Tešanj, Teslić i Žepče putem razvojnih agencija i Udruženja privrednika *Biznis centar Jelah - Tešanj* uz podršku Evropske unije.

One-stop shop ured bi trebao olakšati postojećim i novim investitorima, domaćim i stranim, dobijanje svih potrebnih informacija na jednom mjestu, a koje se odnose najviše na registracije preduzeća, radnu snagu, lokacije za gradnju, itd. Projekat finansira EU preko IPA fondova.

Ovo je nastavak saradnje naše tri općine, započēt još 2012. godine. Sada se ta saradnja ostvaruje kroz projekat koji implementiraju TRA-Agencija za Razvoj Tešanj, RAŽ Žepče, Opština Teslić i Udruženje privrednika Općine Tešanj. Kao partner za budućnost mi u Općini Tešanj želimo biti regionalno prepoznatljivi i konkurentni. Uvođenjem one-stop shopova, odnosno jednošalterskog sistema realiziranja svih poslovnih aktivnosti, mi uvodimo moderan pristup pokretanja i razvoja poslovanja. Ovo je već odavno praksa u Evropi, i drago mi je i u tom smislu da pratimo pozitivne trendove, kazao je tom prilikom Načelnik općine Tešanj *Suad Huskić*.

Današnjem svečanom činu su prisustvovali, između ostalih predstavnici delegacije EU u BiH *Martin Šider*, Načelnik općine Žepče *Mato Zovko*, Načelnik opštine Teslić *Milan Miličević*, ministri u Vladi *Zeničko – dobojskog kantona Himzo Smajić* i *Zvonimir Anđelić*, predsjednik Vanjskotrgovinske komore BiH *Bruno Bojić*, potpredsjednik Udruženja privrednika *Biznis centar Jelah – Tešanj*, *Venan Hadžiselimović*, direktorica RAŽ-a *Branka Janko*, šef odjela za razvoj u Opštini Teslić *Dragan Mišić*, u svojstvu domaćina direktor TRA *Ismar Alagić*, te brojne zvanice i gosti.

Saradnja ove tri općine počela je projektom BEAR – područje poslovne izvrsnosti, što je prepoznao i FDI magazin, glasilo *Financial Times-a* i proglasio ovo područje Evropskom regijom budućnosti za 2014/2015. godinu. Zajednička saradnja tri općine rezultirala je povećanjem broja zaposlenih, prometa firmi i izvoza.

U projekat COBEAR koji je nastavak projekta BEAR, uključene su 33 kompanije sa područja Općine Tešanj u četiri sektora – metaloprerađivačka, tekstilna industrija, prehrambena industrija i drvoprerađivačka. Analiza je pokazala da je izvoz na uzorku ove 33 kompanije povećan za 42,64%, da je promet povećan za 23,66 %, dok je broj novoupisanih povećan za 13,89%.

OPĆINA TEŠANJ U PROTEKLIH OSAM GODINA INVESTIRALA 2,5 MILIONA KM ZA STIPENDIRANJE STUDENATA

Načelnik općine Tešanj Suad Huskić potpisao je ugovore sa 408 studenata o njihovom stipendiranju u školskoj 2015/2016 godini. Općina Tešanj izdvojila je u proteklih osam godina oko 2,5 miliona KM za stipendiranje oko 1.500 studenata.

Praksa stipendiranja studenata u Općini Tešanj započela je školske 2008/2009 godine, kada je stipendije dobilo 234 studenta sa područja ove Općine. Broj stipendista se povećavao, tako da je u posljednje četiri godine, za ovu svrhu u općinskom budžetu izdvojeno 1.350.000 KM.

U našem Tešnju o sticanju znanja se oduvijek vodilo računa. Jedna od biblioteka sa najdužom tradicijom, nalazi se upravo u našem gradu. I ove godine smo nastavili sa podjelom stipendija studentima. Praksa je uvedena prije ravno osam godina, i drago mi je da smo do sada samo za ovu svrhu uspjeli izdvojiti milionske iznose. Na mladima, ali i obrazovanima svijet ostaje. Zato investiramo u naše buduće inženjere, doktore, apotekare, menadžere i profesore, kazao je Općinski načelnik Suad Huskić.

Ubrzan industrijski razvoj tešanjске privrede prati povećan interes studenata za tehnička zanimanja. Tako npr. saobraćajni fakultet studira 30 studenata, mašinstvo 28, tehnološki 28, visoku poslovnu tehničku školu 25, farmaceutiku 18, prirodno - matematički 17 studenata. Također, medicinu studira 30 studenata, elektrotehnički fakultet 11, poljoprivredni 8, itd.

Prva četiri ugovora potpisali su Kanita Krdžalić, studentica 2. godine Elektrotehničkog fakulteta u Sarajevu sa prosjekom ocjena 10, Azelma Demirović studentica 3. godine Fakulteta elektrotehnike u Tuzli sa prosjekom ocjena 9,00, Naid Dizdarević 1. godina Medicinskog fakulteta u Tuzli učenik generacije u Srednjoj tehničkoj školi u Tešnju, i Lamija Orlović 3. godina Ekonomskog fakulteta u Tuzli sa prosjekom ocjena 9,15.

Na svečanosti upriličenoj u Domu kulture, u ime studenata obratio se Anis Cerovac koji je tokom studija medicine koristio ovakav vid podrške i koji je imao prosjek 9,79, a danas je zaposlen u Općoj bolnici Tešanj.

Osim ovog programa stipendiranja dodiplomskih studija, Općina Tešanj ima program podrške i za postdiplomski i doktorski studij.



U TEŠNJU ODRŽAN TREĆI SAJAM SREDNJIH ŠKOLA I FAKULTETA

U Tešnju je 25. marta otvoren treći po redu Sajam srednjih škola i fakulteta. Organizator Sajma je Općina Tešanj u saradnji sa srednjim školama sa područja Tešnja. Sajam podržava i Udruženje privrednika Tešnja, a sve u cilju školovanja kadra u skladu sa stvarnim potrebama privrede.

Ove godine na Sajmu je učestvovalo 8 srednjih škola i 22 fakulteta iz Sarajeva, Banja Luke, Zenice i Travnika, i drugih gradova.

Interes za Sajam je veliki, kako učenika, roditelja, tako i obrazovnih ustanova i institucija. U prilog tome ide i činjenica da je Sajam ove godine okupio rekordan broj učesnika iz cijele Bosne i Hercegovine. Naš koncept razvoja u mladima, njihovom obrazovanju, njihovim prilikama da pokrenu vlastiti biznis, vidi zapravo investiciju za budućnost. Cilj Sajma je razvoj svijesti o važnosti obrazovanja i podsticanje ličnog razvoja pojedinca i društva u cjelini, na putu ka prosperitetu nadolazećih generacija u Bosni i Hercegovini, kazao je Općinski načelnik Suad Huskić.

Učenici sa područja općine Tešanj, ali i susjednih općina, kao i njihovi roditelji, imali su priliku prisustvovati sajamskoj prezentaciji škola i fakulteta sa prostora cijele Bosne i Hercegovine. Na ovaj način želi se omogućiti mladim ljudima, maturantima osnovnih i srednjih škola, lakši izbor srednje škole ili fakulteta.

U prethodne dvije godine, na Sajmu je učestvovalo oko 20 različitih fakulteta iz cijele Bosne i Hercegovine, 10 srednjih i 15 ostalih institucija koje su vezane za obrazovanje.

Sajam srednjih škola i fakulteta je jedan od ciljeva definisanih Strategijom razvoja Općine Tešanj. Osim Sajma, Općina Tešanj već petu godinu realizuje i Javni poziv za najbolje poslovne ideje mladih, koji je za ovu godinu otvoren od 18. januara, kao poseban način podrške mladima da pokrenu vlastiti biznis. Na ovaj način mladi su u proteklom periodu registrovali 24 poslovna subjekta i zaposlili 46 osoba. Također, u proteklih osam godina Općina je izdvojila oko 2,5 miliona KM za stipendiranje oko 1.500 studenata.



12.

SAJAM PRIVREDE TEŠANJ 2016.

Kraševo bb - Carina
19.05. - 22.05.2016.

